

Nā Wai Ngā Pihikete I Tāhae?

nā Karyn Paringatai


Atakura

He Whakatau

Me mātua pānui kia mārāma rawa koe ki ngā whārangi 8–14 o tēnei pukapuka.

He whakarāpopoto

Pānuitia te whakarāpopoto ki te ākonga. Ka pātai a Māmā ki tōna whānau, “Nā wai ngā pihikete i tāhae?” Pānuitia te pukapuka kia kite a nā wai i tāhae.



He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia te āhuetanga kāore e kitea ai tētahi mea, kei wāhi kē atu rānei tētahi mea, kāore i te wāhi e tūmanakohia ana.

Matapakia ngā kare ā-roto o te ākonga i a ia e rapu ana i tētahi mea ngaro.

He aha ngā kare ā-roto o te ākonga mehemea e whakaaro ana te tangata i runga i te pōhēhē nāna tētahi mea i tāhae, otirā ehara nāna taua mahi?

He Matapaki

Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tataui i ngā hē), te rere o te reo;
- titiro mēnā e mārāma ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuetanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mīhini ripene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. Ki a Māmā, i ahatia ngā pihikete ngaro?
2. He aha tāna pātai ki tōna whānau?
3. I hea ngā pihikete?
4. Ki ōu whakaaro, he aha ngā kare ā-roto o te whānau i te pātaitanga a Māmā, “Nāu ngā pihikete i tāhae?”
5. He aha pea ngā kare ā-roto o Māmā i tōna kitenga mai i ngā pihikete i roto i tērā atu kāpata.

Ngā whakautu ki ngā whakapuaki māramatanga

1. Nā tētahi o te whānau i tāhae.
2. Nā wai ngā pihikete i tāhae?
3. I tētahi atu kāpata.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuetanga o te pukapuka nei.

Te pūtake

I He tautuhi i ngā kare ā-roto hei pūtake o te kōrero.

He whakatakinga ā-roto, he whakaharatau

I mua i te pānui i te pukapuka, matapakia te ngaro haere o ētahi mea i te tangata, te kore kite rānei i aua mea i ngā wā e tūmanakohia ana.

Kia oti i te ākonga te pukapuka te pānui, matapakia he aha a Māmā i pōhēhē ai nā tētahi tangata ngā pihikete i tāhae.

Kōrerorerotia ngā kare ā-roto o Māmā i te ngaromanga o ngā pihikete; o te whānau, i te pātaitanga a Māmā nā wai i tāhae; o Māmā, i tōna kitenga i ngā pihikete.

He āhua rite tēnei kōrero ki te kēmu “Nā Wai Ngā Pihikete i Tāhae i Tō Ipu Pihikete?” Kei te mōhio te ākonga ki ētahi atu kēmu pērā?